



**Arpattarfiit aammalu atletik atorlugu sungiusartarfiit allat nuna tamakkerlugu sananeqarsinnaaneriniq periarfissanik misissuinissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.**

(Inatsisartunut Ilaasortaq Nivi Olsen, Demokraatit)

(Siullermeerneqarnera)

Qujanaq Demokraatit Inatsisartunut ilaasortaataannut Nivi Olsen-imut siunnersuummut uunga pitsaasumut, maani nunatsinni timikkut aalanerulernissamik timigissarnerulernissamillu periarfissaqarnerulersitseqataasussamut.

Timersoqatigiit Kattuffiat (GIF) annertuumik anguniagaqarpoq, tassa 2030-imi aalanerpaajussasugut. Taanna anguniagaq inuiaqatigiinni kikkunnit tamanit iluarisimaarneqarpoq. Demokraatiniilli sikisaassutigalugu iluarisimaarinnineq naammanngitsoq isumaqarpugut. Isumaqarpugut, tassunga ilutigalugu peqataasariaqartugut, anguniakkap angunissaanut.

Iluaqutaanngilaq, qiviimiataaginnarluni utaqqineq, inuit namminneerlutik aalanerulernissaat utaqqillugu. Naamik. Ineriartorneq taamaattoq taperserneqartariaqarpoq kajungernartunik ullutsinnullu tulluuttunik atortulersuinikkut, inuit timersorusulissappata. Taamaattumillu tulluusimaarutigaarput, minnerunngitsumik politikikkut kimigiisernitta siunnersuuteqarnittalu kingunerimmagu, nunatsinni piffippassuarni ivigaasaaqqanik arsaattarfiliortoqarnera. Taakku arsaattarfiit aalanerulernermik kinguneqarput, taamaattumillu pingaaruteqartuullutik 2030-imi aalanerpaajunissatsinnut. Sulili allanik piumasaaqatitaqarpoq.

Uuminnga siunnersuuteqarnikkut Inatsisartunut ilaasortaq Nivi Olsen kissaateqarpoq, arpaffissianik atletikkertarfissanillu pilersitsinissamut periarfissat misissorneqassasut. Isumassarsiatsialaavoq, uagut Demokraatiniit soorunami tapersersugarput. Atletikkertarfissat timersorneq pitsaasumik atortoqarluni periarfississavaa, tamannalu timikkut aalanerulernermik innuttaasullu peqqinnerulernerannik kinguneqarluni.

Siunnersuutip akuerineqarnissaa innersuussutigaarput ataatsimiititaliamilu susassaqartumi suliareqqinneqarnissaa innersuussutigalugu.